

# Q'UIPA JUAN

## Crijcunada saludashcamunda

**1** <sup>1</sup> Crijcunada pushaj yuyij gashami alli nishca agllushca huarmimu paibuj churi ushigunamush<sup>a</sup> escribini, paigunada cabishcadimi c'uyani, na ñucallashchu ashtanbish cabishca parluda tuqui yachi chayujcunashmi; <sup>2</sup> chi cabishca parluga ñucuchibi gagushcallamundami c'uyani, ima uragamash ñucuchin gagungallami. <sup>3</sup> Taita Diosmundash Taitabuj Churi Jesucristomundash cushca alliguna, ñucuchida llaquishca, c'uilla causish ñucuchin cabishcabi c'uyibishmi ganga.

## C'uyanucusha causanamunda

<sup>4</sup> Cambuj huahuagunapuramunda maijingunaga Taita Dios mandushcada ñucuchi japishca shina cabishcada rurusha purigujta ricusha pachundimi cushiyagani. <sup>5</sup> Cununga huarmilla, caishujcun chaishujcun c'yanucuchunmi mañabani. Caida cangunamu escribigushcaga na mushuj mandashcachu, ashtangarin callarimunda pacha charishcalladimi gan. <sup>6</sup> C'uyiga caimi gan: Paibuj mandashcagunabi nishca shina causana. Cai mandashcaga, canguna callarimunda pacha uyashca shinaga c'uyibi causachunmi gan.

---

<sup>a</sup>1.1 Agllushca huarmi nishaga, Dios agllushca tandanucushca crijcunadami shina nin.

## **Llullusha crichijcunamunda**

<sup>7</sup> Cai pachabiga llullusha crichijcunaga taugagunami purin. Paigunaga Jesucristo cabishcadi aichayuj tucusha shamushcadaga na parlujcunachu. Maijin shina rurujca llullusha crichij shinaidi Cristoda p'iñajmi gan. <sup>8</sup> Ñucuchi rurashca ama yanga saquirichun, ashtangarin chi ruragushcamunda japinashcada illujtada japingajca cangunallamundadi yuyin gaichi. <sup>9</sup> Maijimbish Cristo yachachishcada na catisha ashtandi yallida yachachijca Diostaga na charinchu. Pai yachachishcagunallada ruragujcarin Taitadash Churidashmi charin. <sup>10</sup> Maijimbish cangunajmu risha cashna yachachishcagunada na yachachij gaquiga huasimu ama huaiguchinguichichu. “Alli shamushcangui,” nishamash ama ninguichichu. <sup>11</sup> Maijin, “Alli shamushcangui,” nijca paiguna layaidi na allida rurujmi tucun.

## **Tucuchingaj yuyiguna**

<sup>12</sup> Cangunamu ninagunadaga milgalladadi charishash p'angabi tintallanga na escribisha ninichu. Ashtangarin ñucuchi illujta cushiyaringujca cangunandi ñahui ñahui ricunucusha parlanucungumi munani. <sup>13</sup> Dios agllashca cambuj ñaña shina gaj crijcunami cangunada, “¿Allillachu ganguichi?” nin.